

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- विधानसभा दे स्पीकर होरें सदन दे कम्मकाज मतल्लक सलाहकार कमेटी दा गठन कीता। 3 मिंबर सत्ताधारी गठबंधन थमां ते 3 विपक्ष थमां न।
- जम्मू दे डिवीजनल कमीशनर रमेश कुमार होरें श्री अमरनाथ जी दी यात्रा 2025 दी तैआरिएं दा उच्च सतह दी बैठक दरान जायजा लैता।
- जम्मू कश्मीर सरकारै आखेआ ऐ जे पिछले 2 ब'रें प्रधानमंत्री ग्रामीण आवास योजना तैहत इक लक्ख 35 ज्हार घरें दा निर्माण कीता गेआ ऐ।
- मौसम विभाग नै अज्ज लेई येलो अलर्ट जारी कीता। मौसम विभाग आस्सेआ हल्की थमां दरमेयानी दर्जे दी बरखा ते बर्फबारी दी पेशगोई बी कीती गेई ऐ।

<><><><><><>

BAC JK

जम्मू-कश्मीर विधानसभा दे स्पीकर अब्दुल रहीम राथर होरें सदन च बक्ख-बक्ख कम्में लेई समें दी बंड्ड तय करने गितै बड़ी महत्वै आहली बिज़नेस एडवाईजरी कमेटी खड़ेरी ऐ। आकाशवाणी दे जम्मू संवाददाता दी रिपोर्ट मूजब, इस कमेटी च बरोधी धड़े सने सभ्मनं सियासी पार्टिएं थमां तजुर्बेकार विधायक शामिल न। एह्दे च सत्ताधारी गठबंधन थमां 5 सदस्यें – गुलाम मोहम्मद सागर, मुबारक गुल, गुलाम अहमद मीर, मोहम्मद युसुफ तारीगामी ते चौधरी मोहम्मद अकरम होरें'गी शामिल कीता गेआ ऐ जिसलै के बरोधी धड़े थमां जेह्ड़े 3 सदस्यें गी इस कमेटी दा हिस्सा बनाया गेआ ऐ, उं'दे च सुनील शर्मा, सज्जाद गनी लोन ते मीर मुहम्मद फ़ैय्याज होर शामिल न। स्पीकर अब्दुल रहीम राथर होर इस कमेटी दे प्रधान होडन।

<><><><><><>

जम्मू दे डिवीजनल कमिशनर रमेश कुमार होरें कल इक उच्ची सतह दी बैठक लाइयै औंदी श्री अमरनाथ जी दी जात्तरा लेई बंदोबस्तें बारै चर्चा कीती। इस मौके पर उ'नें सरबंधत जिला प्रशासनं गी आखेआ जे ओह् श्रद्धालुएं दे रौहने-बौहने मतल्लक मजूदा केन्द्रें ते शौचालयें दी सुविधा वगैरा दे बारै च ब्यौरे देन ते कन्नै बाददू सुविधाएं दे निर्माण लेई अपनिएं जरूरतें बारै बी दस्सन। सरबंधत डिप्टी कमिशनरें गी निर्देश दित्ता गेआ जे ओह् मजूदा ढांचें दी मरम्मत ते रक्ख-रखाऽ सने नमें ढांचें दे निर्माण लेई तैयारियां शुरू करी देन। डिवीजनल कमिशनर होरें सभ्मनें डिप्टी कमिशनरें गी होली दे ध्यार लेई बंदोबस्तें गी अमल च आह् नने दे बी निर्देश जारी कीते।

<><><><><><>

JK MHA

जम्मू-कश्मीर सरकारै आखेआ ऐ जे ओह् केन्द्री सहायता दे किश हिस्सें च तब्दीलिएं आह्ले मामले गी, इक उचित मंच उप्पर गृह मंत्रालय कन्नै पुट्टोग। आकाशवाणी दे जम्मू संवाददाता मूजब, हंदवाड़ा थमां विधायक सज्जाद गनी लोन हुंदे आसेआ पुच्छे गेदे इक सोआलै दे परते च मुख्मन्त्री ओमर अब्दुल्ला होरें खजाना मैह्कमे दे प्रभारी मंत्री दे तौर उप्पर एह् जानकारी दित्ती जे सरकार, झेहलम ते तवी नदिएं च हाड़ें दी रोकथाम सरबन्धी परियोजना सने पनबिजली परियोजनाएं लेई प्रावधानें च बदलावें दा मामला केन्द्री गृह मंत्रालय अगगे रक्खोग। एह् पुच्छे जाने पर जे कया केन्द्री मदाद च कोई कमी कीती गेदी ऐ, तां उमर होरें एह् साफ कीता जे केन्द्र सरकार दी तरफा नियमित तौर उप्पर सहायता हासल होआ करदी ऐ।

<><><><><><>

JKSSB Fee

जम्मू-कश्मीर सरकारै आखेआ ऐ जे बक्ख-बक्ख भर्थी म्तेहानें लेई लैते जाने आह्ले आवेदन शुल्क गी घट्ट करने दी कोई योजना नेई ऐ। आकाशवाणी दे जम्मू संवाददाता दी रिपोर्ट मूजब, जैनापोरा थमां विधायक शौकत हुसैन गनेई हुंदे आसेआ कल विधानसभा च पुच्छे गेदे इक सोआलै दे परते च सरकारै आखेआ ऐ जे जम्मू-कश्मीर सर्विस सलैक्शन बोर्ड दी ई'आं करने दी कोई योजना नेई ऐ। सरकारै इब्बी आखेआ ऐ जे म्तेहानें कन्नै सरबन्धत बक्ख-बक्ख गतिविधिएं लेई होने आह्ले प्रशासनिक खर्चे, इस्सै शुल्क कन्नै पूरे कीता जंदे न।

<><><><><><>

PM Surya Ghar Doda

डोडा दे जिला विकास कमिशनर हरविंदर सिंह होरें पीएम सूर्य घर मुफ्त बिजली योजना दी अमल-आवरी दे कम्मै दा जायजा लैने लेई कल अपने दफतरै च इक बैठक लाई। बैठक दा मकसद, इस योजना तैहत हासल प्रगति दा मूल्यांकन करना, पेश आवै करदी चुनौतिएं गी दूर करना ते जिले च एहदी असरदार ढंगगै'नै अमल-आवरी जकीनी बनाना हा। जिला विकास कमिशनर होरें सरबंघत अधिकारिणं गी निर्देश दित्ता जे ओह अपने मैहकमें दे मलाजमें गी इस योजना कन्नै जुड़ने लेई प्रेरित करन ते उ'नें इस योजना दे फायदें बारै जागरूक बी बनान। उ'नें बिजली विकास विभाग दे एक्स.ई.एन. होरें गी बी निर्देश दित्ता जे ओह इक व्यापक पेशकारी दे राहें लोकें गी इस योजना दे फायदें बारै जानकारी बनान।

<><><><><><>

PMJVK Reasi

जिला विकास काउंसल रियासी दे अध्यक्ष सराफ सिंह नाग होरें रियासी दिणं डिप्टी कमिशनर निधि मलिक हुंदे कन्नै जिला स्तरी कमेटी दी इक बैठक दी प्रधानता करियै अल्पसंख्यक मंत्रालय दी प्रधानमंत्री जन विकास कार्यक्रम योजना तैहत परियोजनाएं गी मुक्कदा रूप दित्ता। केन्द्र सरकार आसेआ चलाई जा करदी इस पैहलकदमी दा मकसद, पूरे देसै च अल्पसंख्यक समुदायें दी समाजी-आर्थिक दशा च सुधार आहनना ऐ ते एहदे लेई मुख्य तौर उप्पर सेहत, शिक्षा ते कौशल विकास ज्नेह खेत्तरें बक्खी मता ध्यान केन्द्रित कीता जंदा ऐ। बैठक दरान किश नमें कम्में दी तजवीज कीती गेई ते डिप्टी कमिशनर होरें सरबंघत सी.एम.ओ ते सी.ई.ओ. गी निर्देश दित्ते जे ओह इ'नें कम्में दी बवहारिकता दा तौले शा तौले पता लान।

<><><><><><>

PMAY G

जम्मू-कश्मीर सरकारै आखेआ ऐ जे पिच्छले द'ऊं ब'रें दरान प्रदेश च प्रधानमंत्री आवास योजना ग्रामीण दे तैहत 1 लक्ख 35 ज्हार 925 घरें दा निर्माण कीता गेआ ऐ। आकाशवाणी दे जम्मू संवाददाता दी रिपोर्ट मूजब, विधायक अरुण गुप्ता हुंदे आसेआ सदन च पुच्छे गेदे इक सोआलै दा परता दि'दे होई ग्रामीण विकास ते पंचैती राज मैहकमे दे मंत्री होरें एह जानकारी सांझी कीती। मंत्री होरें इब्बी गलाया जे समाजी-आर्थिक जाति जनगणना 2011 ते आवास प्लस दे आंकड़ें मूजब, 100 फीसद योग्य लाभार्थिणं गी इस योजना दे दायरे हेठ आहन्नेआ जाई चुके दा ऐ इसकरियै माली ब'रे 2024-25 लेई हून कोई बक्खरा लक्ष्य नेई मित्थेआ गेदा।

ऊ'आं, पैहले दे चरणें थमां अजें बकाया रौहदे 1 लक्ख 40 जहार 21 घरें दा निर्माण मजूदा माली ब'रे च सबूरा करी दित्ता जाहग। मंत्री होरें इब्बी जानकारी सांझी कीती जे जम्मू संभाग च 1 लक्ख 9 जहार 412 घरें दा निर्माण जदके कश्मीर घाटी च 26 जहार 513एं घरें दा निर्माण इस योजना तैहत कीता गेआ ऐ।

<><><><><><>

PMAY-U Poonch

पुंछ दे डिप्टी कमीशनर विकास कुंडल होरें प्रधानमंत्री आवास योजना शैहरी तैहत बनाए गेदे 2 घरें दा वोर्ड नंबर इक च उद्घाटन कीता। उनें इस मौके पर लाभार्थिएं दे गृह पवेश आले कार्यक्रम च बी हिस्सा लैता। एह घर नसीम अख्तर ते अब्दुल क्यूम दे न। उनें सरकारी स्कीम थमां लाह ठोआने लेई लाभार्थिएं दी सराहना कीती ते इस गल्ला पर संदोख जाहर कीता जे स्कीमें दा असर जमीनी सतह पर लब्भा'रदा ऐ। उनें प्रधानमंत्री आवास योजना तैहत लाभार्थिएं गी पूरा करने लेई सरकार दी वचनबद्धता गी जाहर कीता। मगरा डिप्टी कमीशनर होरें म्यूनिसिपल कौंसल पुंछ ते म्यूनिसिपल कमेटी सुरनकोट दी बैठक दी अध्यक्षता कीती ते चीएमएवाई-शैहरी स्कीम दी पूरी पराती प्रगति बारे जानकारी हासल कीती।

<><><><><><>

DC Kathua Festive Meet

कठुआ दे डिप्टी कमीशनर डॉ. राकेश मिन्हास होरें बक्ख-बक्ख मैहकमे दे अफसरें ते धार्मिक संगठनें दे नुमायंदे कन्नै बैठक लाइयै चला'रदे रमजान, होली दे ध्यार ते औंदे नराते दे ध्यार लेई कीते गेदे इंतजामें दा जायजा लैता। बैठक च मुख् करी ध्यान इनें ध्यारें दे सुचारु संचालन पर दित्ता गेआ। एहदे अलावा पीने आला साफ पानी, बिजली सप्लाई, गजिएं च रोशनी, साफ सफाई, मैडिकल सेवा, सुरक्षा ते होर दूइएं चीजें पर चर्चा होई। डिप्टी कमीशनर होरें सारे सरबन्धी मैहकमे गी हिदायतां दित्तियां जे ओह आपू'चै नेड़मा तालमेल बनाइयै कम्म करन तां जे सारे ध्यार रमानदारी कन्नै होई कसन। उनें खाद्य सुरक्षा मैहकमे गी हिदायत कीती जे ओह काला बजारी पर खास तौर पर ध्यान रखन। डिप्टी कमीशनर होरें शांति, रमानदारी ते आपसी भाई चारे प्रति इनें ध्यारें दे महत्व गी उजागर कीता। उनें लोकें गी बी अपील कीती जे ओह प्रशासन दा सैहयोग करन।

<><><><><><>

Yellow Alert

हफता भर बरखा रौहने आली पेशगोई दे चलदे मौसम विभाग नै अज्ज आस्तै यैलो अलर्ट जारी कीता ऐ। आकाशवाणी जम्मू दे संवाददाता दी रिपोर्ट मूजब 10 मार्च मगरा किश थाहरें पर बरखा होई। इयै जेहड़ा मौसम 16 मार्च तगर बने दा रौहग।

मौसम विभाग नै अज्ज लेई केई थाहरें आस्तै यैलो अलर्ट जारी कीता ऐ। उच्चिणं धारें नी केई सारी थाहरें हल्की थमां दरमेयानी दर्जे दी बरखा पेई ऐ। 15 मार्च तगर मेद ऐ जे केई सारी थाहरें पर हल्की बरखा ते बर्फबारी होइ सकदी ऐ। 17 थमां 21 मार्च तगर आम तौरे पर मौयम खुश्क रौह्ग। मौसम विभाग नै यात्रिणं, सैलानिणं ते होर दुए यान्त्रुणं गी सलाह् दित्ती ऐ जे ओह् प्रशासन ते ट्रैफिक विभाग आस्सेआ जारी हिदायतें दी पालमा करन।

<><><><><><>

Run For Fun Jammu Marathon

जम्मू कश्मीर पुलस मैह्कमे आस्सेआ 16 मार्च गी जम्मू दे गुलशन ग्राउंड थमां रन फॉर फन जम्मू मैराथन दा सरिस्ता कीता जाग। एह् द्रौड़ गुलशन ग्राउंड थमां शुरू होग। पुलस हैड क्वाटर दे मुख् गेट थमां बागे-ए-बाहू, कासिम नगर, एनएच-44, फारेस्ट चैक पोस्ट, इनवायमेंट पार्क थमां होंदी होई लघोग। हर चाल्ली दी गडिडणं दी आओजाई द्रौड़ आले रस्ते पर बंद रौह्ग। प्रशासन आस्सेआ होली दे ध्यार गी दिक्खदे होई हिदायत बी जारी कीतियां गेइयां न। एह् ध्यार जम्मू शैहर च 14 मार्च गी मनाया जाग। हिदायत मूजब कुसै बी गड्डी गी रस्ते पर खड़ोने, शिड़क दे केडे खड़ी करने दी इजाजत नेई होग तां जे जाम आली स्थिति नेई बने।

<><><><><><>